

白香山集

白居易撰

白香山集

卷十七

律詩 五言 七言 自兩韻至五十韻 凡一百首

江南謫居十韻

自哂沈冥客。曾爲獻納臣。壯心徒許國。薄命不如人。纔展凌雲翅。俄成失水鱗。葵枯猶向日。蓬斷卽辭春。澤畔長愁地。天邊欲老身。蕭條殘活計。冷落舊交親。草合門無徑。煙消甑有塵。憂方知酒聖。貧始覺錢神。虎尾難容足。羊腸易覆輪。行藏與通塞。一切任陶鈞。

江樓夜吟元九律詩成三十韻

昨夜江樓上。吟君數十篇。詞飄朱檻底。韻墮綠江前。清楚音諸律。精微思入玄。收將白雪麗。奪盡碧雲妍。寸截金爲句。雙雕玉作聯。八風淒間發。五彩爛相宣。冰扣聲聲冷。珠排字字圓。文頭交比繡。筋骨軟於縣。瀾湧同波浪。鏗鏘過管絃。醴泉流出地。鈞樂下從天。神鬼聞如泣。魚龍聽似禪。星迴疑聚集。月落爲留連。雁感無鳴者。猿愁亦悄然。交流遷客淚。停住買人船。闇被歌姬乞。潛聞思婦傳。斜行題粉壁。短卷寫紅牋。肉味經時忘。頭風當日痊。老張知定伏。短李愛應顛。道屈才方振。身閒業始專。天教聲煥燦。埋合命連遭。顧我文章劣。知他氣力全。功夫雖共到。巧拙尙相懸。各有詩千首。俱拋海一邊。白頭吟處變。青眼望中穿。酬答朝妨食。披尋夜廢眠。老僮文債負。宿結字因緣。每歎陳夫子。常嗟李謫仙。名高折人爵。思苦滅天年。

不得當時遇。空令後代憐。相悲今若此。灤浦與通川。

潯陽歲晚寄元八郎中庾三十三員外

閱水年將暮。燒金道未成。丹砂不肯死。白髮自須生。病肺慚盃滿。衰顏忌鏡明。春深舊鄉夢。歲晚故交情。一別浮雲散。雙瞻列宿榮。嶺頭階下立。龍尾道前行。封事頻聞奏。除書數見名。虛懷事僚友。平步取公卿。漏盡雞人報。朝迴幼女迎。可憐白司馬。老大在湓城。

元九以綠絲布白輕褶見寄製成衣服以詩報知

綠絲文布素輕褶。珍重京華手自封。貧友遠勞君寄附。病妻親爲我裁縫。袴花白似秋雲薄。衫色青於春草濃。欲著却休知不稱。折腰無復舊形容。

清明日送韋侍御貶處州

寂寞清明日。蕭條司馬家。留錫和冷粥。出火煮新茶。欲別能無酒。相留亦有花。南遷更何處。此地已天涯。

九江春望

淼茫積水非吾土。飄泊浮萍是我身。身外信緣爲活計。眼前隨事覓交親。鐘烟豈異終南色。湓草寧殊渭北春。此地何妨便終老。匹如元是九江人。

晚題東林寺雙池

向晚雙池好。初晴百物新。鳥枝翻翠羽。磯水躍紅鱗。萍汎同遊子。蓮開當麗人。臨流一惆悵。還憶曲江春。

贈內子

白髮方興歎。青娥亦伴愁。寒衣補燈下。小女戲牀頭。闇澹屏帷故。淒涼枕席秋。貧中有等級。猶勝嫁黔婁。

送客春遊嶺南二十韻

已訝遊何遠。仍嗟別太頻。離容君感促。贈語我殷勤。迢遞天南面。蒼茫海北濶。詞陵國分界。交趾郡爲鄰。鬱鬱三光晦。溫暾四氣勻。陰晴變寒暑。昏曉錯星辰。瘴地難爲老。蠻陬不易馴。土民稀白首。洞主盡黃巾。戰艦猶驚浪。戎車未息塵。紅旗圍卉服。紫綬畏文身。麴苦桃榔。憂漿酸橄欖。新牙橋迎海舶。銅鼓賽江神。不凍貪泉暖。無霜毒草春。雲烟蟒蛇氣。刀劍鰐魚鱗。路足羈棲客。官多譴逐臣。天黃生麤母。雨黑長楓人。迴使先傳語。征軒早返輪。須防孟裏蠱。莫愛橐中珍。北與南殊俗。身將貨孰親。嘗聞君子誠。憂道不憂貧。

自題

功名宿昔人多許。寵辱斯須自不知。一旦失恩先左降。三年隨例未量移。馬頭覓角生何日。石火敲光住幾時。前事是身俱若此。空門不去欲何之。

自悲

火宅煎熬地。霜松摧折身。因知羣動內。易死不過人。

尋郭道士不遇

郡中乞假來相訪。洞裏朝元去不逢。看院祇留雙白鶴。入門唯見一青松。藥爐有火丹應伏。雪竈無人水自舂。欲問參同契中事。更期何日得從容。

潯陽春三首 元和十二年作

春生

春生何處聞周遊。海角天涯遍始休。先遣和風報消息。續教啼鳥說來由。展張草色長河畔。點綴花房小樹頭。若到故園應覓我。爲傳淪落在江州。

春來

春來觸動故鄉情。忽見風光憶南京。金谷蹋花香騎入。曲江碾草鈿車行。誰家綠酒歡連夜。何處紅樓睡失明。獨有不眠不醉客。經春冷坐古湓城。

春去

一從澤畔爲遷客。兩度江頭送暮春。白髮更添今日鬢。青衫不改去年身。百川未有迴流水。一老終無却少人。四十六時三月盡。送春爭得不殷勤。

夢微之

晨起臨風一惆悵。通川湓水斷相聞。不知憶我因何事。昨夜三迴夢見君。

贈韋鍊師

潯陽遷客爲居士。身似浮雲心似灰。上界女仙無嗜好。何因相顧兩徘徊。共疑過去人間世。曾作誰家夫婦來。

問劉十九

綠蠹新醅酒。紅泥小火爐。晚來天欲雪。能飲一盃無。

得行簡書聞欲下峽先以此寄

朝來又得東川信。欲取春初發梓州。書報九江聞暫喜。路經三峽想還愁。蕭湘瘴霧加餐飯。滸渚驚波穩泊舟。欲寄兩行迎爾淚。長江不肯向西流。

南湖早春

風迴雲斷雨初晴。反照湖邊暖復明。亂點碎紅山杏發。平鋪新綠水蘋生。翅低白雁飛仍重。舌澀黃鸝語未成。不道江南春不好。年年衰病減心情。

元十八從事南海欲出廬山臨別舊居有戀泉聲之什因以投和兼伸別情

賢侯辟土禮從容。莫戀泉聲問所從。雨露初承黃紙詔。煙霞欲別紫霄峯。傷弓未息新驚鳥。得水難留久臥龍。我正退藏君變化。一盃可易得相逢。

題韋家泉池

泉落青山出白雲。縈村遶郭幾家分。自從引作池中水。深淺方圓一任君。

醉中對紅葉

臨風杪秋樹。對酒長年人。醉貌如霜葉。雖紅不是春。

遣懷

羲和走馭趁年光。不許人間日月長。遂使四時都似電。爭教兩鬢不成霜。榮銷枯去無非命。壯盡衰來亦是常。已共身心要約定。窮通生死不驚忙。

點額魚

龍門點額意如何。紅尾青鬚却返初。見說在天行雨苦。爲龍未必勝爲魚。

聞龜兒詠詩

憐渠已解詠詩章。搖膝支頤學二郎。莫學二郎吟太苦。纔年四十鬢如霜。

對酒

未濟卦中休卜命。參同契裏莫勞心。無如飲此銷愁物。一餉愁消直萬金。

東牆夜合樹去秋爲風雨所摧今年花時悵然有感

碧萼紅縷今何在。風雨飄將去不迴。惆悵去年牆下地。今春唯有薺花開。

病起

病不出門無限時。今朝強出與誰期。經年不上江樓醉。勞動春風颭酒旗。

夢亡友劉太白同遊彰敬寺

三千里外臥江州。十五年前哭老劉。昨夜夢中彰寺裏。死生魂魄暫同遊。

與果上人歿時題此決別兼簡二林僧社

本結菩提香火社。爲嫌煩惱電泡身。不須惆悵從師去。先請西方作主人。

贈寫真者

子瞻丹青日。予當醜老時。無勞役神思。更畫病容儀。迢遞麒麟閣。圖功未有期。區區尺素上。焉用寫真爲。

劉十九同宿

紅旗破賊非吾事。黃紙除書無我名。唯共嵩陽劉處士。圍棋賭酒到天明。

十二年冬江西溫暖喜元八寄金石凌到因題此詩

今冬臘候不嚴凝。暖霧溫風氣上騰。山脚嶠中纔有雪。江流慢處亦無冰。欲將何藥防春瘡。只有元家金石凌。

閒意

不爭榮耀任沈淪。日與時疏共道親。北省朋僚音信斷。東林長老往還頻。病停夜食閒如社。慵擁朝裘暖似春。漸老漸諧閒氣味。終身不擬作忙人。

送友人上峽赴東川辟命

見說瞿唐峽。斜銜滙漲根。難於尋鳥路。險過上龍門。羊角風頭急。桃花水色渾。山迴若龍轉。舟入似鯨吞。岸合愁天斷。波跳恐地翻。憐君經此去。爲感主人恩。

夜送孟司功

潯陽白司馬。夜送孟功曹。江閭管絃急。樓明燈火高。湖波翻似箭。霜草殺如刀。且莫開征棹。陰風正怒號。

衰病

老辭遊冶尋花伴。病別荒狂舊酒徒。更恐五年三歲後。些些談笑亦應無。

題詩屏風絕句 并序

十二年冬微之猶滯通州。予亦未離湓上。相去萬里。不見三年。鬱鬱相念。多以吟詠自解。前後辱微之寄示之什。殆數百篇。雖藏於篋中。永以爲好。不若置之座右。如見所思。緣是掇律句中。短小麗絕者。凡一百首。題錄合爲一屏風。舉目會心。參若其人在於前矣。前輩作事。多出偶然。則安知此屏不爲好事者所傳。異日作九江一故事爾。因題絕句。聊以獎之。

答微之

君寫我詩盈寺壁。我題君句滿屏風。與君相遇知何處。兩葉浮萍大海中。

偶宴有懷

遇興尋文客。因歡命酒徒。春遊憶親故。夜會似京都。詩思閒仍在。鄉愁醉暫無。狂來欲起舞。慚見白髮鬚。

山中酬江州崔使君見寄

眷眎情無限。優容禮有餘。三年爲郡吏。一半許山居。酒熟心相待。詩來手自書。庾樓春好醉。明日且迴車。

山枇杷

深山老去惜年華。況對東谿野枇杷。火樹風來翻絳豔。瓊枝日出曬紅紗。迴看桃李都無色。嘆得芙蓉不是花。爭奈結根深石底。無因移得到人家。

聞李尚書拜相因以長句寄賀微之

憐君不久在通川。知已新提造化權。夔高定求才濟世。張雷應辨氣衝天。那知淪落天涯日。正是陶鈞海

內年肯向泥中拋折劍。不收重鑄作龍泉。

歲暮

窮陰急景坐相催。壯齒韶顏去不回。舊病重因年老發。新愁多是夜長來。膏明自燕綠多事。雁默先烹爲不才。禍福細尋無會處。不如且進手中盃。

雨中赴劉十九二林之期及到寺劉已先去因以四韻寄之

雲中臺殿泥中路。既阻同遊懶却還。將謂獨愁猶對雨。不知多興已尋山。纔應行到千峯裏。只校來遲半日閒。最惜杜鵑花爛熳。春風吹盡不同攀。

薔薇正開春酒初熟因招劉十九張大夫崔二十四同飲

鹽頭竹葉經春熟。階底薔薇入夏開。似火淺深紅壓架。如錫氣味綠粘臺。試將詩句相招去。儻有風情或可來。明日早花應更好。心期同醉卯時盃。

李白墓

採石江邊李白墳。遠田無限草連雲。可憐荒隴窮泉骨。曾有驚天動地文。但是詩人多薄命。就中淪落不過君。

對酒

漫把參同契。難燒伏火砂。有時成白首。無處問黃牙。幻世如泡影。浮生抵眼花。唯將綠醅酒。且替紫河車。戲答諸少年。

願我長年頭似雪。饒君壯歲氣如雲。朱顏今日雖欺我。白髮他時不放君。

風雨晚泊

苦竹林邊蘆葦叢。停舟一望思無窮。青苔撲地連春雨。白浪掀天盡日風。忽忽百年行欲半。茫茫萬事坐成空。此生飄蕩何時定。一縷鴻毛天地中。

題崔使君新樓

憂人何處可銷憂。碧甃紅欄溢水頭。從此潯陽風月夜。崔公樓替庾公樓。

山中戲問韋侍御

我抱棲雲志。君懷濟世才。常吟反招隱。那得入山來。

贈曇禪師

五年不入慈恩寺。今日尋師始一來。欲知火宅焚燒苦。方寸如今化作灰。

寄微之

帝城行樂日紛紛。天畔窮愁我與君。秦女笑歌春不見。巴猿啼哭夜常聞。何處琵琶絃似語。誰家髑髏髻如雲。人生多少歡娛事。那獨千分無一分。

醉吟二首

空王百法學未得。姪女丹砂燒即飛。事事無成身老也。醉鄉不去欲何歸。兩鬢千莖新似雪。十分一盞欲如泥。酒狂又引詩魔發。日午悲吟到日西。

曉寢

轉枕重安寢。迴頭一欠伸。紙窗明覺曉。布被暖知春。莫強疏慵性。須安老大身。雞鳴猶獨睡。不博早朝人。

答元八郎中楊十二博士

身覺浮雲無所著。心同止水有何情。但知瀟灑疏朝市。不要崎嶇隱姓名。盡日觀魚臨澗坐。有時隨鹿上山行。誰能拋得人間事。來共騰騰過此生。

湖亭與行簡宿

潯陽少有風情客。招宿湖亭盡却迴。水檻虛涼風月好。夜深唯共阿怜來。

八月十五日夜湓亭望月

昔年八月十五夜。曲江池畔杏園邊。今年八月十五夜。湓浦沙頭水館前。西北望鄉何處是。東南見月幾回圓。臨風一歎無人會。今夜清光似往年。

贈江客

江柳影寒新雨地。寒鴻聲急欲霜天。愁君獨向沙頭宿。水遠蘆花月滿船。

殘暑招客

雲截山腰斷。風驅雨脚迴。早陰江上散。殘熱日中來。却取生衣著。重拈小簾開。誰能洵晚熱。閒飲兩三盃。

潯陽秋懷贈許明府

霜紅二林葉。風白九江波。暝色投煙鳥。秋聲帶雨荷。馬閒無處出。門冷少人過。鹵莽還鄉夢。依稀望闕歌。

其思除醉外。無計奈愁何。試問陶家酒。新蕒得幾多。

九日醉吟

有恨頭還白。無情菊自黃。一爲州司馬。三見歲重陽。劍匣塵埃滿。籠禽日月長。身從漁父笑。閒任雀羅張。問疾因留客。聽吟偶置觴。歎時論倚伏。懷舊數存亡。奈老應無計。治愁或有方。無過學王勃。唯以醉爲鄉。

問章山人

身名身事兩蹉跎。試就先生問若何。從此神仙學得否。白鬚雖有未爲多。

送蕭鍊師步虛詞十首卷後以二絕繼之

欲上瀛洲臨別時。贈君十首步虛詞。天仙若愛應相問。向道江州司馬詩。花紙瑤緘松墨字。把將天上共誰開。試呈王母如堪唱。發遣雙成更取來。

贈李兵馬使

身得貳師餘氣概。家藏都尉舊詩章。江南別有樓船將。燕領虬鬚不姓楊。

題遺愛寺前溪松

偃亞長松樹。侵臨小石溪。靜將流水對。高共遠峯齊。翠蓋煙籠密。花幢雪壓低。與僧清影坐。借鶴穩枝栖。筆寫形難似。琴偷韻易迷。暑天風撼撼。晴夜露淒淒。獨憩依爲舍。閒行繞作蹊。棟梁君莫採。留著伴幽棲。

廬山草堂夜雨獨宿寄牛二李七庾三十二員外

丹霄攜手三君子。白髮垂頭一病翁。蘭省花時錦帳下。廬山雨夜草菴中。終身膠漆心應在。半路雲泥迹

不同。唯有無生三昧觀。榮枯一照兩成空。

聞楊十二新拜省郎遙以詩賀

文昌新入有光輝。紫界宮牆白粉闥。曉日雞人傳漏箭。春風侍女護朝衣。雪飄歌響高難和。鶴拂煙霄老慣飛。官職聲明俱入手。近來詩客似君稀。

三月三日懷微之

良時光景長虛擲。壯歲風情已闌銷。忽憶同爲校書日。每年同醉是今朝。

贈韋八

辭君歲久見君初。白髮驚嗟兩有餘。容鬢別來今至此。心情料取合何如。曾同曲水花亭醉。亦共華陽竹院居。豈料天南相見夜。哀猿瘴霧宿匡廬。

春江閒步贈張仙人

江景又妍和。牽愁發浩歌。晴沙金屑色。春水麴塵波。紅蕖交枝杏。青含卷葉荷。藉莎憐軟暖。憩樹愛婆娑。書信朝賢斷。知音野老多。相逢不閒語。爭奈日長何。

春聽琵琶兼簡長孫司戶

四絃不似琵琶聲。亂寫真珠細撼鈴。指底商風悲颯颯。舌頭胡語苦醒醒。如言都尉思京國。似訴明妃厭虜庭。遷客共居相勸諫。春腸易斷不須聽。

吳宮詞

一入吳王殿，無人覩翠蛾。樓高時見舞，宮靜夜聞歌。半露胸如雪，斜迴臉似波。妍媸各有分，誰敢妬恩多。

送韋侍御量移金州司馬

春歡雨露同密澤，冬歎風霜獨滿衣。留滯多時如我少，遷移好處似君稀。臥龍雲到須先起，蟄燕雷驚尚未飛。莫恨東西溝水別，滄溟長短擬同歸。

自到潯陽生三女子因詮真理用遣妄懷

官途本自安身拙，世累由來向老多。遠謫四年徒已矣，晚生三女擬如何。預愁嫁娶真成患，細念因緣盡是魔。賴學空王治苦法，須拋煩惱入頭陀。

江西裴常侍以優禮見待又蒙贈詩輒敘鄙誠用伸感謝

一從簪笏事金貂，每惜溫顏放折腰。長覺身輕離泥滓，忽驚手重捧瓊瑤。馬因迴顧雖增價，桐遇知音已半焦。他日乘鈞如見念，壯心直氣未全銷。

自江州司馬授忠州刺史仰荷聖澤聊書鄙誠

炎瘴拋身遠，泥塗索脚難。網初鱗撥刺，籠久翅摧殘。雷電頒時令，陽和變歲寒。遺簪承舊念，剖竹授新官。鄉覺前程近，心隨外事寬。生還應有分，西笑問長安。

除忠州寄謝崔相公

提拔出泥知力竭，吹噓生翅見情深。劍鋒缺折難衝斗，桐尾燒焦豈望琴。感舊兩行年老淚，酬恩一寸歲寒心。忠州好惡何須問，烏得辭籠不擇林。

初除官蒙裴常侍贈鵲銜瑞草緋袍魚袋因謝惠貺兼抒離情
新授銅符未著緋。因君裝束始光輝。惠深范叔綈袍贈。榮過蘇秦佩印歸。魚綴白金隨步躍。鵲銜紅綬遠身飛。明朝戀別朱門淚。不敢多垂恐汙衣。

洪州逢熊孺登

靖安院裏辛夷下。醉笑狂吟氣最麤。莫問別來多少苦。低頭看取白髭鬚。
初著刺史緋。答友人見贈

故人安慰善爲辭。五十專城道未遲。徒使花袍紅似火。其如蓬鬢白成絲。且貪薄俸君應惜。不稱衰容我自知。銀印可憐將底用。只堪歸舍嚇妻兒。

又答賀客

銀章暫假爲專城。賀客來多懶起迎。似掛緋衫衣架上。朽株枯竹有何榮。
別草堂三絕句

正聽山鳥向陽眠。黃紙除書落枕前。爲感君恩須暫起。鐘峯不擬住多年。
久眠褐被爲居士。忽挂緋袍作使君。身出草堂心不出。廬山未要動移文。
三間茅舍向山開。一帶山泉遶舍迴。山色泉聲莫惆悵。三年官滿却歸來。
鍾陵餞送

翠幕紅筵高在雲。歌鐘一曲萬家聞。路人指點滕王閣。看送忠州白使君。

潯陽宴別 此後忠州路上作

鞍馬軍城外，笙歌祖帳間。乘潮發湓口，帶雪別廬山。暮景牽行色，春寒散醉顏。共嗟炎瘴地，盡室得生還。

戲贈戶部李巡官

好去民曹李判官，少貪公事且謀歡。男兒未死爭能料，莫作忠州刺史看。

行次夏口先寄李大夫

連山斷處大江流，紅旆逶迤鎮上游。幕下翱翔秦御史，軍前奔走漢諸侯。曾陪劍履升鸞殿，欲謁旌幢入鶴樓。假著緋袍君莫笑，恩深始得向忠州。

重贈李大夫

早接清班登玉陛，同承別詔直金鑾。鳳巢閣上容身穩，鶴鎖籠中展翅難。流落多年應是命，量移遠郡未成官。慚君獨不欺顛顚，猶作銀臺舊眼看。

對鏡吟

閒看明鏡坐清晨，多病姿容半老身。誰論情性乖時事，自想形骸非貴人。三殿失恩宜放棄，九宮推命合漂淪。如今所得須甘分，腰佩銀龜朱兩輪。

江州趁忠州至江陵已來舟中示舍弟五十韻

昔作咸秦客，常思江海行。今來仍盡室，此去又專城。典午猶爲幸，分憂固是榮。篋簋州乘送，樓櫓驛船迎。共載皆妻子，同遊卽弟兄。寧辭浪迹遠，且貴賞心并。雲展帆高挂，鷗馳棹迅征。泝流從漢浦，循路轉荆衡。